



## STINAPA TA INFORMA

### E promé “Female Park Ranger”

Esei ta e título ku Denice Boelen-Keller tin mag di karga ku orguyo. E ta wardami ku un sonrisa kaluroso na e ofisina prinsipal di STINAPA na Barcadera. Denice tin dos yu awor, un mucha hòmbler di 12 aña i un mucha muhé di 4. Denice mes a nase na Boneiru, meskos ku su mama. Su tata ta un Rubiano i su kasá ta un hulandes europeo ku ta ‘skreinwèrker’ (karpinté fini). Nan tur dos ta hopi religioso i nan ta hasi hopi trabou sosial. “Despues ku mi a pasa mi hubentut aki na Boneiru, m’a bai St. Maarten na 1997. Despues atrobe m’a bai Kòrsou, kaminda m’a bai den Wardakosta. Mi no a finalisá e training, pasobra tabata hopi pisá. Pero tòg mi tin hopi probecho di e periodo ei pasobra m’a siña hopi einan i m’a haña mi nombramentu komo polis èkstraordinario. Esei tabata un kos hopi positivo pa mi solisitut.” E tin 4 aña bèk na su Dushi Boneiru awor i for di ougùstùs 2005 e ta traha pa STINAPA. For di desèmber 2007 e ta “Park Ranger di Parke Nashonal Marino Boneiru” Bo a mira hopi kambio aki? “Sì, no solamente bou di awa, pero voral riba tera. I prinsipalmente grásias na e bon trabou di STINAPA, dor di kua nos ta sobresalí riba e islanan den besindario riba tereno di naturalesa. Mas ku klaro tin kambionan negativo pero eseinan ta den minoria.” Tabata difísil pa bira Park Ranger? “Kompolaga! Mi tabata Assistent Park Ranger i mi mester a sigui algun kurso ku éksito promé ku mi por a bira Ranger. Manera biologia, turismo, pero tambe kon pa atendé ku bishitante. Banda di esei mi mester a pasa eksamen pa kapitan di boto chikí (m’a pasa eksamen di buseo kaba den Wardakosta). I te ainda nos ta sigui kurso i training, manera aworakí serka TCB (Tourist Awareness Program) pero ta bala pena!” Bo ta apliká lokual bo a siña den bo bida priva? “O, definitivamente. Ami ku mi kasá a kaba di haña un pida tereno pa e traha su negoshi, pero nos ta tene kuenta ku e vegetashon eksistente natural. I ku trahamentu di un septictank nos ta minimalisá e kantidat di kímiko ku ta bai den suela.” I kiko ABO lo hasi si abo por a tuma tur desishon na Boneiru pa un dia? “Lo mi hasi hopi kos! Lokual parsemi hopi útil ta un sorto di ‘Boot Camp’ (Kampamentu di formashon), kaminda mucha ku no tin hopi chèn den bida lo por a siña algu di naturalesa. Tambe nan lo por siña kiko ta disiplina, pero den un ambiente di naturalesa. Tambe e lo ta un lugá kaminda nan por bai skol i siña un fishi útil, manera mètsla òf karpinté.”

*Skirbí pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**